

平定粵匪紀略

平定粵匪紀略卷八

咸豐九年己未正月江南軍克復浦口城

是時江浦守城逆爲薛三元遣其心腹羅華清等謁見張總統願獻城勦賊贖罪和大臣遣參將李世忠詣城受降獻出江浦縣城於正月二十七日進攻浦口出不意陣斬僞懷天福等逆渠數名斃賊千餘遂復浦口當世忠之未往受降也羣逆知三元有變率隊急攻江浦三元已下令皆薙髮歸正協力死拒潛乞師於水師游擊賴鎮海鎮海以兵往援會世忠至

閻遂解三元改名成良後於十年復叛爲李提督世忠擒斬以徇

楚南軍大捷於南康勦平新城墟及池江等處逆巢

逆由南康縣窺贛州在新城墟築僞城其首逆則踞池江補用道蕭啓江奉曾侍郎援贛之檄正月十七日抵賢女埔偵知賊有七八萬衆當以計取伏兵附近各隘令管帶田勇知縣周慶榕誘賊出擊精兵盡起陵谷中建楚軍旂幟驚以爲天外飛來棄營壘遁追斬無數削平僞城進攻池江小溪鳳凰城燬其老

巢賊竄南安

皖軍再復浦口

參將李世忠等既克浦口奉勝大臣檄會擊高旺之賊奮勇衝殺立蹋其柵壘十餘座逃匪復糾合小店諸逆驟撲浦口擊走守城兵繼擁而入世忠引勝兵回勦鏖戰數日賊勢漸挫都司朱光興等三面環擊復克其城殲斃無算擒髮逆百餘浦口肅清

福建軍克復連城縣龍巖州

閩逆戰敗回竄江西閩之汀州甯化等郡縣先後皆

復惟連城逆尙負隅陰圖觀豫東南濱海地沃衍物  
產極豐惟甌閩僻阻獨磽确多貧民逆便於誘煽故  
雖無所獲不肯去閩督撫密飭延建邵道潘駿章督  
同紳耆設法散其羽黨陸續投誠者七八千人選其  
精壯充新勇老弱還鄉里官吏妥爲存卹從賊多無  
聊賴旣喜自新有路皆相引舍賊去乃調集總兵豫  
祺副將王捷元參將袁良等督諸軍於正月初十日  
一鼓進攻盪平之餘匪由葛溪一帶竄陷龍巖州復  
派都司賴正修已革汀漳龍道英樸等二十三日夜

進攻城內紳民開城接應逆衆四散奔逃殲擒二百餘名立將州城克復

### 江南軍克復灣沚黃池

逆踞宣城縣屬之灣沚與黃池相依倚大爲徽甯患和  
大臣先飭提督鄧紹良攻灣沚力戰陣亡總兵鄭魁  
士繼往派參將鄭朝棟等分路進攻斃匪千餘名於  
正月二十四日收復灣沚復督副將朱承先攻黃池  
盡平其壘

### 二月皖南軍克復婺源縣

婺源於上年八月失守張京堂飭接辦軍務之皖南鎮總兵江長貴攻勦獲勝正月間密派得力將弁斷其接濟二十八九等日疊次大勝二月初一日會同各軍鏖戰七時俘馘無數斬險直入立復縣城

### 江南軍擊敗皖逆於江浦浦口

江浦浦口次第克復皖北各路悍賊暨黃池灣沚諸潰匪不下七八萬合踞烏衣鎮汭河口等處圖伺蒙奪兩城爲六合援張總統國樑遣總兵李若珠游擊薛成良於二月初九日由黃山迎勦逆酋結連九洑

洲之賊直撲浦口張總統躬率大軍分三隊長驅截賊數段李若珠等亦自黃山得勝回前後夾擊殲斃二千餘生擒僞固天福洪方僞立天豫莫興等二十餘名江浦亦爲逆所撲竝橫截浦口大道總兵周天培游擊賴鎮海出城接戰而大軍亦至賊棄械遁江楚軍克復南安府城信豐解嚴

蕭道啓江已平新城墟及池江賊壘擬由龍迴問道先援信豐徐圖南安屢獲諜訊南安逆勢窮蹙且畏官軍旦暮至民一夕數驚因有機可乘遂率所部及



管帶田勇之周慶榕由青隴黃隴至三角嶺見城中  
火突起知己內亂大軍鼓勇攀堞而登東北門已徧  
立官軍旂幟遂於二月初三日克復府城時信豐告  
急之函日至初五日冒雨往援初七日會同知府曾  
國荃總兵遮克敦布進攻初十日分八路痛勦踴皇  
賊巢伏尸徧野遮總兵一軍適當逆賊竄路斬馘尤  
多信豐之圍立解

皖逆逼犯廬州大營前署安徽巡撫事布政使李孟羣  
死之

孟羣河南進士湖北殉難按察使李卿穀之子以廣西卽用知縣從軍自廣西湖南北安徽轉戰數千里累著戰功洊升安徽布政使自湖北帶兵援皖獨當一面以署安徽巡撫時廬州失陷奉

旨褫職留營自効時駐軍官亭長城一帶以堵廬州西面賊由六安州來撲奮力堵退二月十五日復以大股撲副將鄧清知縣李孟荃兩營相繼失陷復併攻左右兩營自辰至戌賊來愈衆李布政中營力不能禦被賊擁入猶持矛屹立圍牆厲聲罵賊手刃悍賊三

名力竭死得

旨優卹其忠骸藁葬廬州千總沈國泰深入賊巢覓獲與練總褚國泰護送至壽州翁巡撫派其兄李孟荃送回原籍父子先後殉難遠近哀之

三月皖軍勦逆於八斗嶺克之

先是逆糾安慶黨圍撲護城營四面築堅壘數十座以困我師副將格洪額等射火箭入賊壘悉焚其棚帳賊驚退營圍頓解而渠逆陳玉成憤賊衆屢敗思逞志於我糾合大股齊竄八斗嶺勢極猖獗勝大臣

親統大軍進勦密遣得力將弁選精銳爲後勁防賊抄襲前隊旣捷毀壘四座逆果分萬餘悍賊繞出大營後諸員弁豫爲戒備連環轟擊賊紛紛潰退勝大  
臣復回隊督戰追斬無數遂移駐張橋撥馬隊扼守  
八斗嶺

### 楚軍水陸援湘

逆首石達開自出金陵至安慶久與洪逆隔絕續誘脅擁衆已至十餘萬欲因便踞險自雄乃由江西南  
安府取道崇義竄入湖南桂陽縣總兵劉培元彭定

秦率一千二百人防堵爲賊二萬餘人包抄致大挫  
失桂陽城陷興甯宜章縣亦相繼失守方賊之由湘  
入鄂而擾豫章也湖南官紳籌勇籌餉百計分援湘  
力自弱故石逆乘虛而入幸猛將壯士之假歸於家  
者肩摩轂擊駱巡撫與邑紳左京堂今閩浙總督宗  
棠等星檄諸郡一月內成軍四萬餘人擇隘設守官  
大臣胡巡撫復飛咨都將軍調撥吉林黑龍江馬隊  
回鄂馳赴湘南派知府蕭翰慶率水師礮船三十二  
隻剋期會長沙時逆燄已擾及新田嘉禾沿途裹脅

官大臣恐由衡永竄長沙復增派參將趙福元率南  
勇二千數百自黃州往副將陳金鰲自楊提督水營  
往副都統舒保選員帶馬隊二百自皖界往皆先入  
鄂稟受方略分馳而去其湖北軍務胡巡撫駐黃州  
督辦以固守爲事姑緩謀戰先增募薪黃襄鄖勇各  
千餘人且守且練以補援湘之虛

皖軍克復六安州

逆黨踞六安分擾英霍以圖旁竄勝大臣督重兵赴  
正陽關堵扼賊援調諸練勇勦六安薄城下逆出戰

敗退前六安州知州茅念劬霍邱縣練總守備趙春和開礮轟擊斃賊四百餘名附城卡壘及關廂木柵數十處蹋毀罄淨官軍晝夜環攻三月十九日填濠直上茅念劬趙春和首先登城已革副將盧又熊等繼之逆黨出南門奔舒城霍山追殺三十餘里

楚南軍敗逆於永州城諸州縣解圍

逆陷桂陽興甯宜章等縣復間道撲郴州桂陽州進窺衡州魏喻義帶勇迎勦斬髮賊千名逆不敢犯改道由甯遠竄永州府時記名道劉長佑帶兵回援飭

副將余星元等分路擣郴桂諸賊巢均獲捷劉道獨  
勦永州焚賊壘二十餘處斃賊六七千生擒五百餘  
遂解永州圍其另股竄至祁陽縣下游之觀音灘亦  
經兵勇追勦斃賊無算

### 皖軍克復霍山縣

逆盤踞皖境每藉捻匪爲聲勢勝大臣於三月二十  
三日受捻首張元龍降投誠衆以萬計鳳陽府縣及  
臨淮關三城同日收復聲威益壯自復六安後敗匪  
紛竄茅念劬等跟蹤追殺直至霍山北面署知縣王



自銘見大隊齊到奮勇進攻將守陣之賊擊退乘勢登城賊由東門逃竄立復縣城追勦逃匪數百名生擒百餘名其舒城來援之賊先經我軍在白洋舖截殺千名大獲全勝

江南軍擊敗九洑洲諸逆

三月十五十八等日張總統派總兵李若珠副將馮子材進勦九洑洲各率所部直擣中堅斬馘無數逆於浦口之西南連築營壘張總統周天培選隊攻勦三戰三捷直趨九洑洲二十五日三路進兵殺賊數

百近處逆壘一律蹋平

五月皖逆陷盱眙城尋克復

盱眙濱臨洪澤湖五月二十六日被逆衆闌入勝大  
臣卽派營總烏勒興阿伏高橋左側衝城賊爲數段  
逆衆跟蹤敗歸濱湖水師開礮斃賊無數勝大臣復  
挑選湖內網船配以槍礮由老子山一路溯流上駛  
扼盱眙之背復派副都統富勒德恩布等分路進逼  
六月初二日夜陸兵銜枚疾走抵東關馬隊先登步  
隊繼進逆衆倉皇潰竄我軍槍箭齊施水師亦鼓勇

登岸轟擊再接再厲斃賊不計其數立復縣城其澗溪一帶副都統麟瑞等接仗亦獲全勝

六月楚南軍攻克景德鎮及浮梁縣城

逆初踞景德鎮勢燄薰熾江右要衝之區肆行無阻及南安既復信豐解圍大爲官軍所創懲張道運蘭會同王文瑞等圍鎮半載斬獲雖多仍未得手上月會侍郎添派知府曾國荃帶湘中等營五千八百人赴鎮協攻六月十三日夜逆出大陣四十餘座輔以夾岸陸賊圖襲艇師劉道于瀉屯軍西瓜洲燃火彈

拋擊陸師亦排礮助勦燒其大箒竝延及賊卡無數  
賊衆棄鎮竄浮梁會國荃與張運蘭等水陸進攻十  
五日抵浮梁縣悍逆三四千人出浮橋列陣以待我  
軍迎擊立斃二百餘名落水死者千人遂將縣城收  
復

皖逆犯來安及滁州擊卻之

盱眙城復後陳玉成圖報復六月初六日率死黨攻  
來安參將李世忠守城豫伏壯勇於南北兩門外自  
督守備董正品衝入賊營所向披靡賊乘虛襲城伏

起攔擊世忠回隊夾攻賊敗走十五日偵陳逆連夜走滁城四面環攻卽親帶弁勇乘勝由水口焚燒賊糧斬逆目十一名分三路進勦逆衆又潰

逆陷定遠縣前淮揚道郭沛霖知縣周佩濂死之

逆之未攻來安也遣其黨糾合捻匪圍定遠縣前淮揚道郭沛霖畱守與知縣周佩濂激厲勇丁百計自固竝屢出城痛勦賊氣沮解圍去及來安旣敗復率大隊擁至總兵惠成出隊攻勦因賊勢太衆兵饑久絀不得力遂於六月十八日夜失陷知縣周佩濂督

所親巷戰身受數十創猶挺刃奮殺斃數賊而死自  
外委周汝諮周炳濂以下從死者十餘人前淮揚道  
郭沛霖由翰林起家素以志節自勵守揚州時爲兵  
勇挾護出城以不死自恨獲咎後爲翁巡撫奏調赴  
皖以守定遠功蒙

賞五品頂戴至是無守土責可趨翁巡撫大營以前咎效  
死勿去遂及於難

卹贈光祿寺卿

湖南逆大隊圍寶慶府楚軍擊敗之

石逆以祁陽之敗圍衡州不獲乃攻寶慶府裹脅極衆號稱數十萬連營百餘里長圍僅闕北一面時鄂省援師先後至管帶水陸諸將亦皆自長沙進勦副將田興恕軍府城之南卽選道趙煥聯總兵周寬世軍府城之東城西濱資水各艇師扼之官大臣胡巡撫憂寶慶重地不可無良將爲總統飛檄荆宜施道李續宜率湘營由上巴河督馬步大隊星馳至寶慶軍心資以鎮定先是逆以五月上旬攻寶慶續宜未至趙煥聯周寬世屢挑戰獲勝諸員弁告奮勇開壁

門出擊斬前鋒驍悍塞其大旂水師亦轟礮助威逆  
不爲動前隊攻城後隊築壘石逆達開踞城南十里  
之澄水橋賴逆文光踞城西五里之神灘渡傳逆踞  
城東十二里之泥灣是爲三逆首大壘其餘纍纍若  
貫珠者不可枚舉田興恕驍勇夙著數衝鋒血戰駐  
營城外最近賊爲之少卻劉道長佑部楚勇由武岡  
州繞道郡城西北巨山埠總兵劉培元率艇師由益  
陽溯資水而上與劉道會從北路調集副將余星元  
楊恒升等紮范山從東路調集候選知府今雲南巡



撫劉嶽昭副將朱品文等紮龍安橋剋期大舉縱橫  
盪決逆衆雖數敗於勢無損北路逆新壘悉成自是  
寶慶城四面皆被圍矣官軍之營於洪橋者復受挫  
潰散守城大恐六月十九日李續宜由安化進駐藍  
田距府城一百四十里閱伍籍共兵勇三萬有奇悉  
受節制聽調遣逆首聞援軍大至且畏續宜威挑精  
悍併力致死裹三日糧誓破寶慶兼分賊四出撲營  
李道進兵高家冲會劉道商破逆之策劉道言東路  
逆勢厚且巖壑幽邃不可用武李道乃定計由北路

進攻旋敗半邊街藍江埧襲營諸賊遣劉培元造浮  
橋於釀溪濟師飭劉嶽昭奈星元等朝暮率游兵突  
東南二面牽賊勢俾不得防禦西北自督大軍渡資  
水而西賊衆方撲半邊街官營未之覺大軍直擣匡  
家嶺逆巢掩旂鼓從山背襲之賊大潰乘勝蹴毀田  
家渡柵壘東路逆聞亟渡資水以拒李道戒各營勿  
動密令副將沈俊德胡裕發等出西路爲橫截之兵  
參將毛有銘出後路爲包抄之兵林密山曲伏兵則  
派營官于高勝郭鵬程濠內外賊蹤徧滿防兵則派

副將蕭慶衍梁作楫自督親兵勁旅及馬隊伺賊懈縱擊之聲震山谷斬驍賊無數諸將亦齊集報捷李道以賊勢已靡然悍且衆慮多傷我戰士不如分搆其巢穴令黨衆散亂自後東討西擊發縱指示戰輒有功共毀賊壘柵一百八十餘座斃賊二萬餘生擒三千餘獲器械馬匹諸雜物巨萬賴傳二逆皆潰竄石逆亦氣奪心驚不敢復萌自湘圖鄂之志

七月皖軍疊破悍賊來安滁州解圍

陳玉成率死黨攻來安犯滁州副將李世忠擊之逆

少邵尋復糾衆圍來安並分屯於城西北卓家巢等處賊壘幾徧七月二十日世忠督令李元忠等帶勇出隊偵賊志已驕挑戰僞敗而精銳四伏不動賊笑官軍怯亦退休李世忠又環譟賊營以激其怒賊不爲意惟槍聲斷續作備禦而已夜各壘寂然知賊火藥漸竭乃鳴鼓角驟進踔厲迅發火彈火箭滾滾落賊壘赤光燭天賊猝驚無所措乘勢掩殺破壘二十八座追奔數十里獲米糧器械運轉入城二十二日李世忠帶隊回滁州飭都司朱元興蔣立功等破沙

河集龍停口賊壘四十七座滁州之圍亦解

江南軍擊敗六合天長各賊

德大臣師久無功爲和大臣奏參江北軍務改歸和  
大臣統轄派福建陸路提督李若珠渡江攻六合總  
兵張玉良攻天長七月二十三、四等日接仗各有斬  
擒水師總兵吳全美攻魯港鴉山總兵李德麟攻大  
通荻港亦於七月初五、初八等日獲勝破賊壘多座  
生擒僞指揮羅開文等九名

楚南軍勦寶慶竄逆連戰皆捷

石逆受創於寶慶猶聚踞東南路七月十二日諸營  
分路進剿大戰於賀家坳營總德海等馬步奮擊李  
道續宜率候選同知直隸州金國琛等督隊衝殺陣  
斬僞元帥胡德孝僞統戎陳麗江殲斃數百名其東  
路襲龍安橋之賊趙道煥聯敗之南路九鞏橋白楊  
舖之賊田副將興恕敗之陣斬僞佐旂總制黃立英  
僞檢點陳明官等十餘名生擒五百餘名內有僞將  
軍蔡光遠周學福王智明僞提審孫子安割獲髮辮  
三千二百餘件候選道江忠義一軍亦生擒僞將軍

李定發僞通傳許六祥等四十五名十七十八等日  
劉道長佑追賊至白倉大臨橋生擒僞統戎將軍十  
餘名石逆張黃蓋指揮迎拒副將胡福發督勇官羅  
重世等躍馬直進奮力衝殺賊始潰竄追斬一千有  
奇二十四五等日復追擊於白茅寺直至東安縣沿  
途殲戮極衆其竄永明縣之賊擾近道州小坪一帶  
亦經知縣魏喻義等追至簡車尾痛勦之湘省以次  
肅清石逆旣與洪逆隔絕其僞官名目以意另立之  
如統戎佐旂提審通傳等僞官皆前所未有云

江西信豐餘匪竄廣東惠韶等府討平之

江西信豐之賊二月初十日竄出後關入廣東竄擾  
惠韶兩郡經兩廣黃總督宗漢飭已革廣西臬司張  
敬修署惠州府知府海廷琛等督帶兵勇擊賊於順  
天湖層坑連平坡頭墟等處追至古洋峒山坳各匪  
爭先渡河我軍分隊勦擊水勢奔溜斃賊五六千名  
殲斃四五千名餘匪散逸粵東肅清

八月皖軍擊賊於盱眙之清壩高家凹

逆數不得逞志於盱眙糾合捻匪沿淮肆擾伺釁進



圖勝大臣遣副都統穆騰阿由洪澤湖東南進勦沈  
煨賊船賊壘無數復沂淮而西督守備余通海礮船  
往來搜殺逆情漸蹙乃於八月二十八日撲我清壩  
高家凹營盤營官張得勝格洪額併力迎拒僞前軍  
主將吳如孝素以剽悍稱自鎮江逸出至皖北肆毒  
張得勝直前衝殺用手槍擊斃割取首級並所服黃  
馬褂懸馬首死黨爭先奪尸被我軍殲戮殆盡賊衆  
向南潰走追殺數十里

楚軍攻石牌鎮拔其僞城

石埭鎮隸安徽懷甯與潛山太湖等縣接壤爲由楚  
入皖要衝先於八年八月爲多隆阿鮑超攻克後因  
三河之失陷賊益加堅守造僞城高二丈餘礮眼星  
列環以深濠椿籤密布阻我入皖之師兼通太湖糧  
運官大臣以僞城不拔終礙東征嚴飭總兵鮑超謹  
守太湖營而令福州副都統多隆阿總馬步兵勇攻  
之是月二十八日銜枚捲甲齊抵城根參將楊朝林  
雷正瑄游擊趙旣發東路進都司周天祥守備李德  
謙陳天佑北路進參將穆正春南路進多副都統勒

所部馳西路四面會攻安慶潛山逆裔聚來援撥馬  
隊分二路迎擊之賊敗走我軍遂專力攻城衝冒矢  
石抉礮眼而入生擒僞霍天燕石廷玉等四十七名  
擊斃數千名力拔僞城醜類無漏網者

九月石逆全隊犯廣西桂林省擊卻之竄陷慶遠府

廣西自洪秀全等全股下竄近十年頗安謐間有廣  
東土匪竄擾隨時堵勦地方肅清石逆達開在湖南  
寶慶永明道州疊次懲創知無可竊據旁皇路歧老  
賊多藉廣西者愆令歸竄遂由新甯城步等處山僻

小路直犯桂林曹巡撫謝鍾督率文武固守竝挑選  
精銳或輕師出襲或左右環攻夜乘大風拋擲火箭  
噴筒焚燒賊壘使賊無刻安時官大臣駱巡撫已遣  
將弁馳援劉道長佑蕭道啓江各統湘營部曲由新  
甯赴省前廣西布政使蔣益澧參將蕭榮芳自柳州  
聞警趨至九月初四日蕭道啓江一軍由南門文昌  
門分投進剿破賊壘數座與前布政使蔣益澧水陸  
兜擊擒殺無數初十日逆衆由南路潰散省城解圍  
二十日竄陷慶遠府

十月皖軍克復懷遠縣

縣濱淮河毗連定遠爲廬州犄角自逆踞後官軍屢爲阻撓勝大臣計清淮河必自懷遠始十月初四日遣副都統穆騰阿知府秦榮游擊黃開榜等督馬步礮船水陸進攻由臨淮入渦河破賊壘五座直抵文昌閣焚燒沿河賊壘斷浮橋截其糧運三戰三捷城圍遂合奪賊艇三百擊沈無數殲斃近萬人十四日黃開榜獨拔幟先登兵勇繼進逆大潰立復縣城

江南軍勦六合失利

李提督攻六合被援逆竄踞紅山窯橫截大營後路  
和大臣派總兵馮子材等援勦營於紅山窯之東因  
大礮震裂兵勇驚潰致東營復爲賊踞六合大營被  
圍糧盡援絕統帶忠勇詹啓綸列營南門外密探得  
逆壘口號呼嘯而出李提督率衆從之遂突重圍註  
揚州西路

皖南軍勦涇縣逆黨獲捷

皖南涇縣之賊由查邨進犯周總統天受派副將石  
玉龍游擊申明照等併力擊退周天受親往督勦十

月初七日逆大隊至南山嶺石玉龍力戰逆少卻復  
竄章家渡參將周天孚自灣灘馳往逆衆猶隔河死  
拒周天孚率參將朱景山等各軍接應內外夾攻逆  
衆潰走石玉龍申明照均以血戰亡玉龍鎮筆行伍  
自廣西轉戰至皖南戰功卓著明照亦屢立戰功於  
浙東均奉

旨優卹

江南軍復失利於浦口

和大臣派湖北周提督天培扼浦口連營結壘爲江

浦聲援自六合軍潰逆衆益肆糾合諸死黨窺圍浦口張提督撥兵勇馳往協堵時逆勢鴟張屢戰失利周提督力竭捐軀營壘皆陷大軍退保江浦

十一月江南軍疊破江浦逆壘

自浦口官軍失利逆匪東伺揚儀西逼江浦南窺溧水兇燄復熾張總統渡江躬親督勦十一月十一日平毀北山新卡十四日攻破城南賊巢十五六日逆於磨盤洲築壘官軍四路蹙之賊衆大挫狂奔北門外賊營亦同時攻破其陳家集等處之賊竄回天長



南路之賊窺伺溧水亦經防軍擊退二十三日江浦對岸地道內火藥轟發官軍竝未受傷賊匪自斃無數乘勝擊之復將西北逆壘二十餘座平毀揚州邊界一律肅清

皖南軍復敗賊於黃池南

既獲捷涇縣逆退踞董家邨十一月十九日撲高級黃柏嶺官營副將榮升督都司張維坤擊走之又竄擾河西爲參將朱景山等所敗副將吳再升遂乘勝進勦黃池南岸之牛頭山逆壘北岸逆糾黨來援分

兵迎拒殺斃極多逆壘皆平北岸逆潰走渡河我軍  
遂收復南岸

池州府內應獻城旣克復陷

楊提督彭玉麟水師駐安慶聞池州府爲賊守城之  
韋志俊堅志投誠遂由彭玉麟親率三營赴池剴切  
開諭受其降令獻城贖罪遂收復池州府韋志俊旋  
派其部下頭目古隆賢等進攻蕪湖古隆賢等甘心  
從逆糾衆回撲府城韋志俊等隨同官軍迎勦自十  
月十四日至是月二十五日屢敗賊於西北門外柳

波磯青溪關等處因衆心不一府城復陷

楚軍會籌勦皖敗賊於槎水畝

曾侍郎旣解閩浙圍駐軍建昌居中調度江西恃以保障嗣石逆竄湖南蔓延千數百里獲諜稱欲入蜀官大臣胡巡撫以蜀之安危關係中原大局請以曾侍郎率兵入川得

旨允行八月二十五日曾侍郎由湖口抵鄂時石逆屢經懲創川中已有備無患復於九月內會奏暫緩入川會籌勦皖曾侍郎紮營上巴河俟湖南撤回各兵分

攻皖逆先是多隆阿鮑超率馬步九千餘人攻太湖  
道員蔣凝學唐訓方率七千人駐荊橋扼安慶石牌  
之衝以爲援應以參將余際昌率二千人攻英山以  
保蘄黃胡巡撫旋由黃州親往策應及曾侍郎會師  
軍心益壯賊由天堂王婆坳等處進撲圖解太湖之  
圍已爲我軍勦退是月十九日桐潛大股逆黨三萬  
餘人陸續圍集將襲我天堂後路余際昌帶昌字全  
軍會同帶禮桂三營之訓導丁華先商令潛山縣知  
縣葉兆蘭糾集本地練勇分路設伏二十一日一戰

克之陣斬偽漢天侯拱天豫二名斃賊數千名生擒一百餘名獲騾馬旂幟無數餘賊奔潰

十二月湖南建表忠祠求忠書院

湖南自曾侍郎倡率團練羅李二布政先後募訓練丁悉成勁旅陣亡各大員已蒙

恩許立專祠駱巡撫請再建於長沙省並以提督鄧紹良瞿騰龍等未得專祠者別建表忠祠部曲員弁兵勇一律附祀復建求忠書院令陣亡後嗣入院續書所需經費由官紳倡率捐辦得

旨允行

平定粵匪紀略卷九

咸豐十年庚申正月江南軍攻克沿江逆壘九洲老  
巢亦平之

張總統國樑既擊敗江浦羣逆聲威復振部勒各軍  
期大舉正月初九日水陸並進薄浦口沿隄逆壘九  
洲出悍賊三面赴援總統躬率敢死士直前嬰鋒  
再接再厲縱橫出入所向皆靡總兵張玉良踵至亦  
分投痛埽援賊大潰乘銳蹙之擣其壘沿江戰艇林  
立礮聲不絕逆首尾不能相顧副將陶茂森等鼓勇

先登衆兵蟻附而上平逆壘八座卡十餘斬首千餘級初十日遂合兵攻九洲洲老巢沟涌潮進越重濠縱火焚其穴煙燄蔽天賊自相踐藉死者以數千計楚軍痛勦援賊克復太湖潛山二縣

九年十二月僞英王陳玉成以其悍衆竝句結捻首張落刑龔瞎子等由江浦廬州定遠上犯號稱十餘萬時楚軍圖皖破天堂之賊圍攻太湖副都統多隆阿會蔣道凝學總兵鮑超分兵迎敵二十一二等日多隆阿等三軍斃賊六七千名賊趨小池驛二十四



至二十八九等日圍逼霽字營鮑超率兵勇血戰兼旬不卻步官大臣等咨商曾侍郎抽添分派各營駐小池驛新倉竝潛山之落溪河等處堵勦十年正月十一日賊衆分四股撲營知府金國琛帶兵紮仰天庵會集諸路軍靜鎮以待賊乘霧登山我軍驟起撲之或橫攻腹背或攔截首尾賊衆紛紛潰敗隊崖落澗者不計其數生擒賊日藍承宣素擾害蘄黃者寸磔之而高橫嶺逆壘同時爲參將余際昌等率昌字禮字九營破之斃賊三千餘生擒四百餘名二十五

六等日各營奮力攻勦縱火燒山各路殺賊約計二萬餘名太湖城內之賊見援賊全敗竊路宵遁卽於二十六日克復太湖縣城餘賊竄入潛山併力抗拒副都統多隆阿等督兵尾追距城數里賊衆悉行出撲兵勇奮力迎擊賊遂大潰因馬隊截其歸路不敢入城狂奔至青草隔被殲無數二十八日卽克復潛

### 山縣

### 楚南分軍援川

石逆受創於桂林賊勢雖衰擁衆尙十餘萬聲稱取

黔道入蜀四川將軍有鳳權總督事咨調湖南蕭啓  
江一軍前往蕭道先奉曾侍郎檄以皖逆上犯移緩  
就急率所部赴楚行至常德適有太湖之捷官大臣  
曾侍郎乃飭折回不必來鄂時聞川省叙州土匪滋  
事令由常德取道入川先勦土匪以保全完善之區  
如石逆果至四川亦可就近堵勦

皖軍克復鳳陽府縣二城生擒擒首張元龍等

淮河上下爲捻匪盤踞與粵逆消息相通互爲援應  
勝大臣濮城一挫軍威不能復振致廬州定遠久淪

賊中奉

旨飭赴河南督辦勦匪事宜皖省軍務

特派袁甲三爲

欽差大臣責令速殲醜類哀大臣遂督兵克復臨淮關圍逼鳳陽屢獲大捷府城逆首鄧正明等潛來乞降正月二十三日克復府城擒首張元龍先於勝大臣軍前投誠仍踞縣城首鼠兩端陽降陰叛經袁大臣飭總出張得勝誘出擒縛凌遲處死並獲僞丞相張先等十四人卽時正法二十六日克復縣城

皖軍克白鑑橋

逆踞白鑑橋爲定遠聲勢屢撲官營均擊退正月二十四日翁巡撫用投誠圩民李林豐爲鄉導攻東北二圩內應獻出首逆二名圩壘悉平二十五日總兵鮑雲翥督馬步兵練進勦白鑑橋生擒髮逆二十餘逆勢漸蹙二十七日總兵慶端由壽州至派副將于昌麟都司哀祚烜韓殿甲副都統薩薩布游擊王懋勲參將馬升平等四路齊進悉平白鑑橋諸壘掩殺略盡進規定遠

楚南援皖軍克復建德縣

皖南之建德縣毗連江西在東流縣迤南久爲逆匪  
占踞九年十二月楚南官軍由江西進勦屢勝逆堅  
伏不出是年正月前廣東南韶連道吳坤修總兵普  
承堯分路直薄城根斬擒極多二十三日吳道貞賊  
將遁約諸軍合力驟攻兵勇緣城而上立將縣而克  
復賊衆竄馬田哨官高得勝等中路邀擊刃悍賊數  
名並刺斃黃衣賊目餘匪驚潰由九都遁去

逆陷安徽涇縣旌德縣

張京堂督辦皖南軍務克復婺源縣後逆衆仍於皖南竄擾屢擊獲勝九年冬竄踞涇縣之黃柏嶺灣灘等處經官軍擊退是月二十五日大隊進撲縣城副將楊名聲知府陳炳元督戰斬逆首僞岡天燕賴汝禾賊黨四面衝至遂陷涇縣二十六日旌德亦相繼失守張京堂力保徽郡飛調江長貴一軍援勦石逆竄擾廣東界

石逆自桂林解圍後竄踞慶遠府城復分股由富川縣境竄入廣東撲連山廳兵勇奮擊獲勝生擒僞先

五  
鋒范亞侗副將恒通亦敗賊於三江寨令鄉團沿路  
邀截生擒老賊五名餘匪回竄湖南是年正月復由  
湖南藍山桂陽輾轉至廣東樂昌仁化始興等縣皆  
爲兵勇擊敗正月二十三日又擾及南雄州屬之百  
順司副將哈芬布擊走之殲賊四五百名

二月江南軍克復上下關焚逆巢壘

金陵上關濱江有壽德洲下關濱江有七里洲久爲  
賊踞官軍旣破九洑洲老巢和大臣張總統定議招  
降以解散賊黨申明大義諭令去逆就順壽德七里



二洲守營賊目秦禮國謝茂廷相率投誠願約期攻  
上下兩關爲內應二月初三日張總統會諸路軍進  
勦總兵熊天喜由七里洲寶塔橋平毀賊壘乘勢收  
下關秦禮國亦從壽德州轟礮內擊總兵劉季三率  
官軍長驅直進斬馘無算上關亦復沿河以上諸逆  
巢爲官軍痛勦逆連夜棄壘退守江東門是役也克  
復重關平賊巢數十計獲大礮百餘戰船六十拔難  
民男婦撫定脅從約五千餘人

江南軍擊退江浦逆

正月十四日江浦逆勢蹙結連瓜子山匪黨突出衆數千紛撲官營總兵張玉良分軍爲左右夾擊張總統聞警卽至從中路衝殺援賊大敗奪路而逃斬馘無數逆回保江浦

逆陷廣德州入浙江界

自涇縣陷後皖南諸郡縣震動二月初三日廣德州失守闌入浙江之安吉縣距抗城一百數十里羅巡撫遵殿乞援於曾侍郎時湘營勁旅悉派攻安慶而由徽赴浙約程必兩月餘緩不濟急合辭入請

上命欽差大臣和春兼辦浙江軍務提督張玉良總統援  
浙諸軍撥兵馳往

擒匪竄陷清江浦

擒匪自咸豐四年十一月爲袁大臣在臨淮關督勦  
後旋復四路竄擾以蒙城霍邱宿州壽州爲老巢於  
江皖及山東河南四省恣意出沒本年正月已奉

旨以袁大臣勝大臣專勦安徽河南之匪復派都統德楞  
額赴山東督辦三等侍衛哈勒洪阿副之以提督傅  
振邦副徐宿督辦總兵田在田副之俾各有專責時

擒匪均在老巢凡欲出擾傳僞令整行具名曰裝旂  
臨行以賊馬前驅名曰邊馬邊馬所至大股隨之前  
所擾害以未占城邑且與粵匪隔越故未悉紀此次  
擾清江浦則爲粵匪所嗾也粵匪將犯蘇杭豫結擒  
首張落刑龔瞎子等使內擾清淮以分江皖兵力清  
江爲河漕聚匪處居室器用踵事華富各擒首垂涎  
非朝夕而自咸豐三年春辦理防堵經前楊河督以  
增及接任河督庚長講求整飭屢勦擒匪土賊海寇  
稱勁旅焉至是聞擒匪有裝旂信庚河督卽撥兵勇

出防於上游三十里之順清河河通南北運道有險  
可憑正月二十八日邊馬驟至河標中營都司德興  
欺賊少因初春水涸河底不深恃勇率衆颺水迎擊  
邊馬疾退須臾大隊擁至德都司等不能敵復颺水  
退歸賊馬亂流追襲兵勇潰散二月初一日捻衆由  
吳家墩至庚河督退保淮城致清江浦失守運使銜  
淮海道吳葆晉陣亡署宿南通判沈鴻罵賊被害捻  
匪踞浦擄掠分股撲淮城庚河督會署漕運總督布  
政使聯英率在城文武及邑紳中書丁晏等登陴守

禦賊不敢攻邊馬順運河西隄薄竇應而下今安徽  
喬巡撫松年時以兩淮運使署江甯布政使總辦江  
北糧臺駐邵伯咨撥兵勇扼守運河兩岸防下竄奏  
派候補知府署泰州運判杜文瀾馳赴鹽城守天妃  
牕以防下河後路署淮揚道朱善張撥礮船由運河  
上堵袁大臣派候補道張學醇副都統克蒙額統帶  
馬步馳援傳提督派總兵田在田由安東北路繞道  
至庚河督亦督江南援軍會勦各路奮勇殺入戶徧  
衢巷賊衆驚潰由牕口奪路狂奔遂於二月十二日

克復清江田在出克蒙額等躡縱西追十四十五等  
日敗賊於桃源縣及倉家集匪竄宿遷睢甯意圖兩  
路歸巢均經官軍擊退奔竄邳州復經傅提督等設  
伏親勦斃賊三千餘名生擒一百八十餘名其潰散  
之賊百十成羣多爲各路兵勇所殲

皖軍大捷於滁州克復全椒縣

參將李世忠守滁州逆糾黨萬餘自全椒往襲圍東  
西北三門城外築堅壘十三座爲久困計二月十七  
日李世忠商同知州李元忠乘賊壘未固督敢死士

出擊逆伏匿不出統兵官朱元興自三界石壩至協  
援副都統銜全福亦領馬隊先一日至商定合兵埽  
盪乘夜銜枚疾趨激火箭焚燒賊壘朱元興等踴躍  
爭先刀矛齊刺逆衆敗奔追至烏衣巷前後抄勦生  
擒殲斃無脫者腰鋪小店諸逆壘平毀悉盡二十二  
日世忠督諸將攻全椒城約投誠目唐得華爲內應  
火起我軍奪門而進立復椒縣城

浙江杭州省城失守巡撫羅遵殿等死之

逆匪由廣德州竄安吉道武康直撲杭州援軍未至



守陣兵寥寥二月二十七日逆衆在清波門暗掘地道轟塌城垣三十餘丈滿營官兵接仗衆寡不敵以致省城失陷巡撫羅遵殿署布政使王友端署鹽運使繆梓杭嘉湖道葉堃杭州府知府馬昂霄仁和縣知縣李福謙均殉難在籍辦團兵部右侍郎戴熙城陷後從容盡節官紳殉者極多杭州駐防瑞將軍昌與副都統來存勒兵堅守滿城鏖戰六晝夜得援軍解圍

三月提督張玉良克復杭州省城

張提督玉良總統浙軍馳援三月初二日由湖州抵大關遣從九品徐殿臣改裝進城密約瑞將軍接應初三日大軍至杭州派守備王玉林攻毀武林門錢塘門外各賊壘參將張應祿勦昭慶寺逆黨令守備龔占黿等伏居艮山門外民房樓上張提督聞城中礮聲大震知端將軍已出營勦賊遂督親軍攻艮山門張應祿由右路游擊蘇如松由中路併力薄城縣丞呂調陽率鄉團肩長梯倚牆而立兵勇緣梯齊登守陣賊拋擲磚石抗拒伏兵從房樓突出支板爲梁

躍上城堞斬長髮賊數十大軍破艮山門而入瑞將  
軍會副都統來存亦自滿城出隊殺退校場悍賊開  
武林門納師各逆匪亡命巷戰殲斃以數千計復追  
勦於獅虎橋城隍山餘逆倉皇竄出遂於是日戌刻  
克復省城初四日復追殺於萬松嶺橫山等處敗匪  
向餘杭而遁

### 皖南軍克復績溪縣

績溪踞逆進撲徽州府副將余永椿分路迎勦至佛  
嶺爲另股賊橫截幸參將袁國祥文生江濤守備張

泰忠等策應振旅而還三月初八日賊復由脾頭撲  
郡城張京堂芾督總兵江長貴先後進兵逆匪傾巢  
而至知府劉兆璜催集鄉練助戰馬隊亦繞出山徑  
會合夾擊賊勢少卻官軍趁勢搶渡浮橋都司江長  
太奮斬僞企天侯鄧傳意生擒十餘名梟首三十三  
級賊衆大潰追奔四十里逮於十二日夜密派隊伍  
進攻績溪縣逆迎拒受創棄城逃竄兵練追出羣嶺  
收復縣城

皖軍擊賊於舒城桐城援逆敗走

逆首陳玉成由江浦六合援潛山太湖圖撲六安州  
壽州翁巡撫飭副將盧又熊等迎戰擊走之舒城亦  
屢戰獲捷二月二十日知縣甘文瀾督勇丁薄賊頭  
營賊拒守不出勇丁繞營後突起躍濠斃賊數十縱  
火焚次營燒賊房多間餘賊潰遁同時北路官軍及  
桐城東鄉練勇擊賊於破岡烏金渡等處燬其營壘  
斬獲極多三月初八日桐城在籍知州毓長庚齊集  
練勇會水師駛往大龍潭俟賊半渡出擊之覆逆艇  
無數生擒八十餘名已渡河賊衆亦爲外委裴人傑

擊敗斃賊二百餘名斬逆目洪球琳楊國宗

### 江南援浙軍克復長興縣

浙逆竄出省垣屢爲官軍追敗羣賊氣沮杭州屬之  
臨安縣湖州屬之孝豐縣於初八十四等日克復逆  
大股踞長興縣三月十五日和大臣所派總兵熊天  
喜曾秉忠分水陸路共規復長興縣天喜督步隊與  
參將劉熙賢由湖州至立毀虹星橋兩逆壘而進知  
縣徐之鑑領民團萬餘助官軍與賊相持曾秉忠已  
帶長龍船由太湖夾浦駛入包洋河合陸兵夾攻長

龍船從山泰門水關攻入民團追賊尾入卽於是日克復長興縣餘匪紛潰

閏三月江浙軍克復廣德州金壇解圍

官軍防守建平東壩已閱數年三月十八日廣德逆匪進撲建平與官軍晝夜鏖戰旋有浙西回竄之賊益以皖南江北新到諸匪紛至合圍衆寡不敵遂於二十一日失守東壩溧陽縣相繼竝陷圍金壇甚急閏三月初一日欲由厚圩犯常州兩江何總督桂清浙江王巡撫有齡遣總兵馬德昭會肅忠熊天喜副

將劉成元等分途迎勦逆悉衆抗拒馬德昭督鄉團  
張兩翼夾擊截斷賊之首尾殲斃七八百名盡毀陽  
溧埭逆巢曾秉忠自埭後兜圍斬獲無算劉成元亦  
於閏三月初二日會練勇銜枚趨金壇轉戰皆捷城  
圍以解其廣德踞逆自進犯建平後守賊無多總兵  
熊天喜偵知乘其不備驟攻之逆潰走先於三月二  
十八日克復廣德州

克復建平縣

廣德城旣復飭已革總兵米與朝於西北路扼要紮



營以杜回竄復抽撥兵勇進攻建平署廣德州知州邵啓元督率團勇會同已革參將方國淮游擊田宗興先後前進分攻東南門轟塌城垛十餘處緣城而上官軍一擁齊入刃光所過積尸填街方國淮田宗興等追賊出西門復敗之於分水龍王廟追殺二十餘里遂於閏三月初二日克復建平縣

### 江南大營退駐丹陽

和大臣於上年添募壯勇增築長圍意謂克復金陵在指顧兵將志驕本年二月浙江告警派師出援存

營兵力漸薄值軍饟不繼擬每四十五日發一月之糧兵勇私布傳單心漸攜貳城逆糾合各處死黨先由後路竄踞句容縣遙相聯絡自閏三月初七日起紛撲大營總統張提督晝夜拒戰而賊來益衆勢漸不支十四日大雷雨酷寒一夜之間各營紛紛火起乃於十五日與和大臣等均退守丹陽收集潰兵以圖後舉

楚軍援皖南會克太平旌德石埭三縣

三城接壤逆踞已久首尾相應援湖北派援浙江之

記名道蕭翰慶等督知府蘇式敬夾攻太平縣城中  
內應舉發哨樓火起我軍乘勢奪門殲斃無數於閏  
三月十三日克復縣城其總兵江長貴一軍率游擊  
黃朝升都司黃占超等直薄旌德城亦同日克復二  
城既拔蕭道遂會合投誠義勇韋志俊等環攻石埭  
縣十四日城逆夜出東門撲官營韋志俊率所部由  
西門迎擊蕭道揮諸軍夾攻城中火突起營官唐仁  
連已率衆登城殲斃不可勝計遂於十五日克復石  
埭蓋三日間疊復三城云

皖南軍克復涇縣

官軍連克旌德等三縣涇縣逆膽已寒猶負隅固守張京堂會同總統周天受進勦令參將文芳等紮三溪副將吳再升等紮琴溪江總兵長貴由茹蘇司溪里進擊毀白華埭公堂一路賊壘直抵城下而副將陳太富與吳再升等先以馬隊攻克赤灘游擊田應科亦涉河擊賊獲勝閏三月二十二日諸軍齊集涇縣城下甯國府知府顏培文帶兵勇踵至江總兵督率進攻轟斃守陣賊目斬關直入逆黨出西南門分

兩路奔竄知縣劉西圖率團掩殺斃賊二百餘名立將涇縣克復其由蘭山嶺等處竄出者亦經知府蘇式敬等截殺無算

江南水師攻克礮磯逆巢

礮磯在蕪湖對岸爲逆老巢與蕪湖之賊聯絡拒守江南水師總兵吳全美帶知州毓長庚督率團練水陸齊進先是從九品殷建中文生陳日煊奉檄招撫逆目陳芸桂率衆投誠爲前驅是月二十四至二十八日連破逆壘六座斃匪千餘人遂克之

金陵逆匪竄陷丹陽幫辦軍務提督張國樑陣亡常州被圍和大臣以陣傷疾發卒於軍

大軍退屯丹陽後溧陽宜興同時失陷逆匪進圍丹陽初猶憚張提督聲威不敢近逼徧築土壘爲步步結營計令黠賊潛入大營中伺提督出戰自後狙擊之受創甚猶血戰刃數賊躍馬入丹陽河而死張提督初名嘉祥廣東嘉應州人在粵頗不逞後率所部於南甯鎮投誠時頗有疑之者廣西巡撫周天爵知其忠勇保護甚至繼隨向提督轉戰數省所向無敵

由偏裨擢升提督幫辦江南軍務東南半壁倚如長  
城及其死丹陽遂陷和大臣突圍而出賊衆進偏常  
州和大臣聚潰兵迎敵胸前重受槍傷衝圍退至濟  
墅關火毒內陷嘔血而死營務處湖北提督王浚壽  
春鎮總兵熊天喜先於丹陽五里亭外分翼迎戰賊  
乘霧冒官軍旂幟數道竝進王浚中槍墜馬殞命熊  
天喜馳救持短兵殺賊甚厲亦力竭捐軀

四月逆竄揚州大軍擊卻之

天長六合之逆乘金陵大營退守分三路進犯一由

陳家集圖揚城一由東溝窺瓜州一由僧道橋編筏  
偷渡襲邵伯李提督若珠調上游礮船副將王萬青  
駛邵伯湖堵勦派參將詹啓綸帶馬隊從三汊河抄  
擊皆擒斬多名賊不敢進乃築壘僧道橋設木城圖  
久踞詹啓綸復由黃珏橋中路直搗逆巢右路副都  
統海全出楊獸壩左路副將劉成元出陳家集疾趨  
會攻逆出衆五六千人迎戰詹啓綸輕騎陷陣盪決  
無前毀逆壘兩座將木城焚燒積尸枕藉生擒長髮  
賊四百餘名逆衆合股退踞陳家集



蘇州省城失守巡撫徐有壬死之

蘇省東南財賦區以常州爲屏蔽歲輸金數百萬充  
餉咸豐六年四月大營潰向大臣力障常州蘇州得  
保及是羣逆圍竄常州何總督桂清遽率司道退保  
蘇州徐巡撫不納乃以照料糧臺爲言退往常熟常  
州城遂於四月初六日失守蘇州藩籬盡撤守兵不  
滿四千脆弱不習戰徐巡撫激厲拊循強爲支柱令  
張提督玉良守高橋扼賊衝三戰皆捷危城少安逆  
分股間道繞出九龍山壓高橋背師潰玉良率敗卒

入省城逆衆追蹤至號稱數十萬城中大亂敗卒應之遂於十三日失陷徐巡撫遇害妾施氏次子候選郎中徐震翼族弟徐曾庾幕友候選布理問鮑鄂銜家丁楊安等從死署按察使糧道朱鈞投井殉蘇州府教授張鏡溇死之布政使薛煥先由常州派駐上海署布政使蔡映斗長洲縣知縣李瀚文元和縣知縣馮樹勳吳縣知縣沈偉田城陷後逃出均奉

旨逮問署蘇州府知府吳雲先期奉巡撫委劄持令赴上海商借援師得免於難

常熟縣知縣周沐潤督練克復江陰縣

逆匪蟻集蘇城恣意擄掠附近民競相團練爲自保計以永昌徐氏爲最常熟縣知縣周沐潤躬親勸諭願聽指揮者遐邇景從江陰與常熟接壤慨然以殺賊自在得沙勇千餘會集各鄉堡練丁旣保常熟遂進勦江陰率練首黃元昌嚴康保等屢戰獲捷斃賊逾千生擒守城逆目餘匪潰散於四月十九日克復江陰縣城

江皖援浙軍克復淳安縣逆黨入徽州境

浙省以次克復諸城時皖南江西援軍尙駐界上遂會勦淳安四月二十一日總兵饒廷選知府彭斯舉分城薄城副將王夢麟亦奉檄率所部兵來會逆勢不支出北門由靈溪竄徽州南鄉之山陽坑官軍遂於二十二日收復淳安縣張副都御史飭王夢麟回皖與已革副將羅承勲合軍追捕大敗山陽坑竄黨隨遁入績溪同知羅仲山守備汪勝又敗之於陽溪十里巖等處民團亦響應助勦旌德縣知縣李焜同在籍翰林院侍讀呂錦文亦迎擊於縣屬之白沙敗

之餘匪踰黃華嶺至太平縣境

浙江嘉興府失守

浙師方圖上游克復溇安縣不圖蘇省失守後逆衆陷吳江直往南竄由王江涇水陸竝進四月十六日嘉興府失守張提督玉良於蘇州衝出率潰兵赴杭王巡撫有齡籌備饟需商令整飭舊部馳往嘉興以勦爲防藉作省城屏蔽

楚軍水陸敗逆於樅陽平其僞城

逆踞池州以殷家匯爲犄角而精銳悉聚於樅陽復

築僞城堅甚楊提督彭玉麟遣投誠之都司韋志俊率步騎由青陽進窺殷家匯而自統水營總兵李成謀參將劉德亮駛舢板船進兩道夾攻盪毀逆壘斃賊一千有奇生擒僞承天福逆目等一百三十七名既平殷家匯進攻池州平城外四門賊寨獲逆艇八逆悉衆入城固守不敢出遂飭水陸軍乘夜渡江襲樅陽江蘇候補知州毓長庚帶領桐城練勇來會遂圍僞城城逆僞連天福萬宗勝窮蹙投誠韋志俊入城受其降尋察萬宗勝有異志誅之僞城遂平池州

逆始孤立

廣西軍克復慶遠府

石逆既攻陷慶遠並擾平樂思恩河池等處餘匪紛  
竄湖南廣東界蔓延滋甚惟慶遠爲逆首踞劉巡撫  
長佑遣前布政使降補道員蔣益澧擊賊晝眉嶺殲  
斃二三千名生擒數百名逆目陳金釭屯聚沙田蔣  
益澧督參將陳友勝抄截獲捷平樂昭平以次肅清  
復分途痛勦思恩河池剪除略盡慶遠逆聞風震恐  
知府榮林率勇練由西路進知縣况逢春由北路進

轉戰追逃斬獲無算四月十九日會集慶遠城城逆  
開南門遁去追殺數十里殲擒多名卽於是日收復  
郡城逆先曾分股攻撲百色廳爲右江鎮總兵富順  
百色廳同知陶兆恩迎擊斬悍目僞國宗石達德等  
逆衆敗走闖入泗城府境凌雲縣知縣余萼銜等堵  
勦又竄思恩府經知府徐引督民團力戰卻之

廣東軍勦逆清遠縣屢戰皆捷

竄逆分擾樂昌南雄等州縣爲官軍擊走罄集清遠  
縣四出恣掠徧擾英德陽山境韶州府知府段詰會



都司方輝鍾南俊督兵勇前勦四月十四日逆衆糾  
合萬餘人由圓仔墳等處分路抄襲我軍三路迎戰  
斃賊無數十五十六等日將蛇灣水車岡等處巢穴  
蹋平逆復由廣甯竄入白芒我軍奮勇追捕所至披  
靡肅清遠諸邊界

逆入貴州界連陷廣順永甯州

逆黨由廣西西隆州竄入貴州境分擾興義貞豐歸  
化諸州縣廳所在兵勇鄉練竭力堵禦匪黨往來無  
停趾徑撲廣順州知州史悠漢帶練丁迎擊逆由間

道抄官軍後闌入州城總兵巴揚阿由廣興鎮進勦  
史悠漢亦集鄉圍隨同助勢立復州城逆敗走復竄  
陷永甯州州附近省垣糾苗匪合撲水田壩官營劉  
巡撫源灝檄鎮遠鎮總兵趙德昌馳援連戰皆捷

貴州軍敗逆於甕溪

逆聲勢猖獗所過悉受其塗炭大衆踞石阡府屬之  
潮添碼等處田提督與恕遣副將沈宏富由龍潭進  
勦四月初三日擊賊六井山毀逆壘二十一座斬僞  
先鋒二十八名斃賊一千有奇逆首悉衆撲甕溪官

營初七日宏富會副將劉吉三周學桂設伏桅杆坊誘賊深入四面兜圍學桂冒險衝突刺斃其督戰逆首生擒僞將軍二十七名餘黨瓦解

曾侍郎加尙書銜署兩江總督督辦江南軍務

侍郎入川未果督兵江皖是月蘇州失陷何總督桂清褫職逮問

命新任江帶薛巡撫煥暫權督篆以曾侍郎素著聲威不避艱險

特命署理兩江總督時在江皖因破賊必據上游應以江

楚爲根本逐節進兵乃商調總兵鮑超霆字營七千人朱品隆所部三千人竝令左京堂宗棠添募湘勇四營訓練成軍以資進剿

楚軍援浙道員蕭翰慶至湖州陣亡

鹽運使銜道員蕭翰慶自咸豐三年隨彭侍郎水師轉戰數省九年由江西調援湖南本年由官大臣胡巡撫派帶訓字營竝韋志俊之軍六千餘人援浙行至皖南爲張副都御史芾畱攻太平等縣三月內連克太平石埭二縣馳援常州行至中途因浙江長興

失守湖州被圍卽馳湖郡四月二十日至距湖州二十里之同心橋遇大股逆匪兜圍蕭翰慶困入垓心力戰陣亡都司李斌彪等亦同時受害守備銜千總李楚材等力戰衝出至湖州城下收集三千餘人奮勉殺賊立解重圍

五月江蘇軍克復嘉定縣太倉州城

蘇常陷後餘匪紛踞各城邑薛巡撫煥總統蘇軍督勇行抵南翔聞嘉定太倉失守於五月初五日遣知縣陳籌溫綸等先勦嘉定自西門進攻逆以馬隊衝

營爲我軍擊退各民團持械助戰一鼓克復嘉定縣  
其太倉州城亦同日攻克敗匪竄崑山新陽  
賊撲滁州皖軍擊走之

逆匪屢圍滁州均經擊退銜憤愈切糾合和州含山  
諸逆黨驟至總兵李世忠派參將蔣立功等分門出  
擊殲賊極多五月初三日賊於西南門築壘九座副  
都統銜全福督兵攻毀又連壘三十座於七里岡我  
軍更番血戰三晝夜至初十日壘埽悉盡斃賊二千  
餘名生擒三百餘名餘圍立解逆之分撲全椒者爲

代理知縣陳炳等敗之於赤鎮焚殲無數

貴州軍克復永甯州旋陷歸化廳

上月州城陷總兵趙德昌馳援屢捷劉巡撫源灝復  
遣記名道署安順府知府周夔參將全興督兵由關  
嶺助勦生擒長髮賊四十四名進攻象鼻嶺逆匪敗  
退大軍薄城下鼓勇登城斬馘無算州城立復另股  
逆衆於五月十二日分陷歸化廳我軍於收復永甯  
後進紮距歸化五里之連升關逆衆大股圍裹致周  
夔全興力戰陣亡

湖州團勇敗賊於平望盡毀賊壘

平望巨鎮爲浙江之嘉興湖州江蘇之吳江總匯處賊踞之沿河六里橋梅堰等處徧築堅壘密釘排樁扼險以阻江浙之路湖州在籍道員趙景賢督率團勇修造礮船槍船進勦毀沿河賊壘五月二十二日親統光澤營都司李桂林同知蔣羅莖廩生李調元等分途往一由鶯脰湖一由六里橋逆出四五千衆兩路迎拒水陸軍槍礮齊轟賊不能支紛紛潰退斃逆目三名餘匪二百餘名趙景賢復添調楚軍之在



近界者會攻平望其湖州之南潯雙林晟舍等鎮鄉團亦合衆助力悉受調度二十五日夜趙景賢密爲布置由鶯脰湖畫眉橋進兵令李桂林從東路攻賊卡李調元從西路撲賊濠以必破爲期東路先捷羣賊自相踐踰逆尸橫道西路李調元亦踰濠冒矢石躍而登壘逆衆驚潰遂克復平望會軍於米市湖盡毀逆礮臺巢穴敗黨紛竄進圖嘉興

### 江蘇軍克復松江府

府城既陷逆遣其黨出巢圖窺上海薛巡撫煥飭候

補道張景渠直隸州州同應寶時督率兵團於五月二十七日乘其不備直擣南門轟斃守陴賊數十名逆衆惶懼應寶時破南門而入斃黃衣賊目十三名長髮賊千餘名奪獲大小船七十餘隻械幟無數當將府城克復餘匪捕戮淨盡自松江至上海沿途團練咸能奮勇立功先出巢者悉爲截殺

楚南援軍克復廣西賀縣

逆目陳金釭哨聚慶遠府之沙田助石逆聲勢上月爲廣西官軍擊敗退踞賀縣劉道嶽昭奉湖南駱巡

撫檄援廣西約會前布政使蔣益澧合兵勦賀縣用  
投誠目包禮安爲鄉導攻蓮塘克之渡河勦河東街  
悍賊殲斬無遺逆衆自東塔來援我軍分兩路夾擊  
大勝乘夜追逼賊衆從浮橋潰竄進復縣城

### 六月江南軍敗逆黨於橋頭

時大營潰軍未集鎮場上下皆爲逆蹤往來六月十  
六日自鎮江西路竄橋頭增設卡壘分擾泥山湯岡  
等處江甯將軍巴棟阿飭副將馮日坤由中路炭渚  
進副將陶茂森由南路山梁進副將賴鎮海駕師船

平定縣志卷之七  
扼橋頭險塞水陸軍剋期會攻兼令總兵馮子材督  
勁旅爲諸軍策應十七日合兵鏖戰自寅至午斬逆  
目二名擒獲極多橋頭炭渚諸逆壘一律燬平追殺  
七十餘里

### 曾大臣駐軍祁門

曾尙書署兩江總督徵集兵勇部署峻整六月十一  
日渡江進紮祁門以固吳會人心兼壯徽甯聲勢是  
月奉

特旨實授兩江總督並

授爲

欽差大臣督辦江南軍務時張副都御史芾駐軍徽州久無成效奉

召入都院南軍務統歸曾大臣督辦周提督天受聽調遣曾大臣請以浙江溫處道李元度調補安徽甯池太廣道以重徽防而聯軍勢

浙江軍克復餘杭臨安縣城

逆匪竄踞餘杭臨安直逼杭州省城瑞將軍遣總兵劉季三督兵前勦復獎勵民團以同仇敵愾相勸勉

爲守望計六月二十二日劉季三等攻餘杭燬賊壘  
數座進薄東南門後隊自西路抵城根登梯而上大  
軍鼓譟以入逆遂驚走盪餘匪一空乘勝平臨安縣  
之青山頭逆壘逆援衆大至我軍奮力衝殺民團亦  
齊力助戰聲震山谷逆衆退保臨安二十九日復環  
攻縣城克之同時富陽新城昌化於潛諸逆蹤所至  
者皆爲民團擊敗始不敢恣意肆掠

皖南逆竄陷廣德州

浙江逆衆出擾皖南屢受懲創由孝豐竄犯廣德州

是時皖南軍赴甯國府解圍疊破賊壘三十餘座揮  
軍轉戰城南七壘亦盪平正得手間警報忽至未及  
回戈而廣德陷矣方逆入廣德州界江提督長貴已  
革總兵米興朝登陣督戰手刃多賊以援師未至遂  
至失陷江提督衝圍出退保四安鎮